

## PLAKETA ZA ŽIVOTNO DJELO – PROF. DR. ANTONU PROSENU

Udruženje geodeta Slovenije je, pod pokroviteljstvom ministra za infrastrukturu i prostorno planiranje, i u saradnji sa Ljubljanskim geodetskim društvom i cjelokupnom geodetskom zajednicom Republike Slovenije organizovalo 3. aprila 2014. Godine u Hotelu Mons u Ljubljani svečanu akademiju pod naslovom *Preuređenje zemljišta kao izazov* na 3. Evropskom danu geodeta i geoinformatičara. Akademiji su prisustvovali brojni ugledni gosti iz Državne skupštine, pojedinih ministarstava, općine Ljubljana, gosti iz inostranstva, predstavnici lokalnih zajednica i mnogi drugih. U okviru akademije dodijeljena je *Plaketa Udruženje geodeta Slovenije za životno djelo iz područja geodezije i prostornog uređenja prof. dr. Antonu Prosenu*.



*Slika: Prof.dr. Anton Prosen*

Profesionalna organizacija Udruženje geodeta Slovenije (ZGS) je dodjelom plakete dr. Prosenu izrazila priznanje i zahvalnost za napore i požrtvovan rad u geodetskoj struci, i to posebno za aktivan rad u strukovnom udruženju i za važan doprinos razvitku i ugledu struke, kao i uspješnom radu Udruženja geodeta Slovenije. Iz obrazloženja za dodjelu plakete može se vidjeti da je dr. Prosen, od samog početka svoje profesionalne karijere, privukao pozornost mnogih stručnjaka i strukovnih udruženja sa područja geodezije i prostornog planiranja. Interdisciplinarni pristup i značaj geodezije u planiranju i upravljanju prostorom bili su dijelom njegovog diplomskog rada. Nakon diplomiranja, stekao je veliko iskustvo u praksi – najprije kao načelnik Općinske geodetske uprave u Ilirskoj Bistrici, a kasnije i kao rukovodilac Odbora za urbanizam, građevinske i komunalne poslove u općini Nova Gorica, te kao zamjenik

direktora Zavoda za društveno planiranje u Novoj Gorici. Struka je brzo prepoznala inovativni pristup u razvoju struke, a veoma brzo je pozvan da preuzme odgovorne funkcije u okviru tadašnje republičke vlade. Umjesto navedenog, odlučio je nastaviti karijeru u okviru akademske zajednice. Nakon diplomiranja i magistriranja, godine 1993, svoje profesionalne i životne stavove prikazuje u doktorskoj disertaciji pod naslovom „Uređivanje ruralnih područja, s naglaskom na ekološku procjenu.“ U okviru dokorskog istraživanja boravio je u Austriji i Njemačkoj (Bavarska), gdje je na Tehničkom univerzitetu u Minhenu pripremao doktorsku disertaciju.

Dr. Anton Prosen je još prije nekoliko desetljeća preuzeo važnu ulogu u razvoju geodetske struke u Sloveniji i na međunarodnom nivou. Kao izuzetno predan predavač na Univerzitetu u Ljubljani, prije svega u okviru studijskih programa geodezije, kao i drugih studijskih programa preddiplomskih i diplomskih studija, mladim naučnicima i stručnjacima trasirao je put u modernu geodeziju, s posebnim naglaskom na ulogu geodezije u području upravljanja prostorom. Na području ruralnog planiranja, ekologije, upravljanja zemljištem i ruralnog razvoja etablirao se kao veoma priznat stručnjak, kako u Sloveniji, tako i u inostranstvu. Rezultati njegovog naučnog i istraživačkog rada prikazani su u dvije monografije, brojnim člancima, izvještajima, stručnim mišljenjima, itd.

Posebna zasluga dr. Prosen je u njegovom nesebičnom i predanom radu u svojstvu glavnog i odgovornog urednika središnjeg slovenskog geodetskog strukovnog i naučnog časopisa "Geodetski vestnik", u izdanju Udruženja geodeta Slovenije. Nakon što je prije jedanaest godina preuzeo uredništvo pomenutog časopisa, niko nije mogao niti pretpostaviti šta će se desiti, obzirom da je tada trebalo doći do obustave objavljivanja pomenutog časopisa. Dr. Prosen i njegovi saradnici su učinili sve da časopis, sa tako dugom tradicijom, opstane i postane temelj za predstavljanje najnovijih naučnih, stručnih rasprava i forum za razmjenu vijesti između struka koje se bave uređenjem, upravljanjem i planiranjem prostora i geodetske struke. Geodetski vestnik je obogaćivan iz godine u godinu i postao je pravi profesionalni časopis. Dr. Prosen je sa saradnicima i autorima podigao razinu tog magazina u ravan sa uglednim međunarodnim naučnim publikacijama. U decembru 2013. godine uredništvo je predao novom timu.

*Admir Mulahusić*